



# **PARTII INUIT** INATSISARTUNI

**Partii Inuit**

**UKA 2013/115**

**Randi Broberg**

**22.11.2013**

Una pillugu siunnersuut:

Naalakkersuisut persuttaasarneq pillugu akiuniarnermut iliuusissatut pilersaarutaat saqqummiunneqartoq Partii Inuit nuannaarutingalugu ima oqaaseqarfigissavarput.

Nunatsinni persuttaasarnerup annertunera erloqinartuuvoq aammalu akuersaarneqarsinnaanngilaq sukumiisumillu akiorniarneqartariaqarpoq sorlaa ilanngullugu. Oqaluuseralugu aammalu ajornartorsiutit piviusutut isingalugu toqqorternagulu.

Partii Inuit isumaqarpugut ajornartorsiut sakkortooq sorlassissagutsigu oqaluttuarisaanerput minnerpaamik qissimittariaqaripput ilanngullugu.

Ilisimavarput ineriartupiloorsimanerup nassatarisimangaa inuusaatsikkut allangortitsisariaqarsimaneq aammalu qulaaniit aqunneqarneq minnerunngittumillu nunaqarfippassuarnik matooraasimaneq pinngitsaalisallunilu nutsertitaasimaneq kalaallit angajoqqaatta allaallu ullumikkut suli inooqatigisatta tamanna aqqusaarsimangaat. Pingaartumik qangaanerulaartoq angutit inoqutigiinni isumalluutaasutut isigineqartut kinaassutsimikkut innarlerneqarsimanermik tarnikkut inissisimalersimanerat pissutingalugu kalaalerpassuit anersaakkut katataasutut misigisimalersimapput. Tamanna imigassamik atornerluinerujussuup aamma pissutigisimasaasa ilagingaat ilaqtariit akornanni inuunerluttuunerup annertusiartorsimaneranik. Tamanna isumaqarpoq inuiattut aqqissuussaanita kukkusumik equngasumilluunniit qalliinnarsiortumik ingerlasimanerata takussutissaatut. Taamaattumik aqqitassaq annertuujuvoq tamatumanilu immitsinnut qulaarluta ajornartorsiut sakkortooq ataatsimoorullugu iliuuseqarfigisariaqarparput.

Taamatut oqareerluta naalakkersuisut persuttaasarnerup akiorneqarnissaanut iliuusissatut saqqummiussaat taperserlugit ima ilassutitut kaammattuuteqarusuppugut makku aamma isiginiarneqartassasut.

Persuttaasarneq annertunerpaamik imigassartortoqarsimatillugu pisarteq paasissutissat ersersippaat. Taamaammatt imigassamik atornerluinerup tamatumunnga ataqatigiisillugu isiginiarneqarnissaa pingaaruteqarpoq.

Aammalu isumaqarpugut meeqqat akornanni tassa inuusuttuaqqani persuttaasoqarsimatillugu ersarissunik iliuusissanik malitassaqaassasoq. Aappariit akornanni persuttaasoqarsimanera pillugu sukumiisumik qulaajaasoqartarnissaa pillugu periusissaqartoqassasoq, tassa ilaatigut ilisimaneqarmat anguterpassuit tarnikkut aamma persuttarneqartarmata aapparissaminningaanniit, soorunami illuatungaanilu.

Tikkuartungassaasinnaasut pillugit suleqatigiisitaqarsinnaavoq, soorlu qimarnguinni sulisut, katsorsaavinni sulisut, politiit aammalu soorlu angutit oqaloqatigiittarfiini suliaqartartut annertuumik ajornartorsiutaasartut pissutigisartagaannik ilisimasaqartuusartut peqataatillugit suleriesissat ilusilersorneqarsinnaaneri kaammattuutigerusunnaqaaq.

Ilanngullugulu annertuumik kissaatiginartipparput meeqqat persuttaanermik isigitinneqartartut suliniuteqarniarnermi isiginiarneqaaqullugit.

Tassami persuttaanermik isigisaqartitsineq meeqqamut sussuteqanngitsumut annertuumik tarnikkut ikiliineruvoq akuerineqarsinnaanngilluinnartoq.

Persuttaasarneq unitsissagutsigu, persuttaasarnerup pissutaata "qiterpiaa" sumik aallaveqarpiarnerisooq aamma ilanngullugu isiginiartariaqarparput.

Tarnikkut ikilersuisarneq, ersinngittuusaamik kanngusaarisarnerit, qinngarsuineq, ingutsisarnerpassuit, inuttullu kusanaallisaarisarnerit annertuallaarujussuurtumik inuiqatigiittut suli atugarineqartut akornatsinni nalunngilluinnarparput, tamannalu tamattaalluta ilumut taamaattoqarnera nassuerutigisariaqarparput, allanngortinnissaanullu ingerlaqqilluta. Inuiqatigiinni pissutsit ilugersunaqisut, ilaatigullu suliffeqarfinni pissutsit, suliffissaaleqinerit allarpassuillu inunnut annertuumik ajornartorsiortitsisartut sanngiillitsitsinermik kinguneqakkajuttut tamatta ilisimalluarunarparput. Tamakkua angerlarsimaffippassuarnut annertuutigit

angerlaanneqartarput, kamanngartarput toqqisisimajunnaartitsisarput naggataatigullu  
ajoraluaqisumik persutaanerpassuarnik ilaatigut kinguneqarsinnaasartuullutik.  
Soorunami tamakkuninngaannaq pissutissaqassalluni naammanngilaq, kisiannili suut tamaasa  
illuatugeriisillugit isiginiarneqarnissaat assut Partii Inuit pingaartipparput.  
Naqissusissavarpulli nakuusernerit suugaluartulluunniit atugassaangimmata.

Pissutsit ataasiakkaarlugit taajungikkaluarlugit Partii Inuit isumaqarpugut ajornartorsiutit  
suulluunniit inuiaqatigiit aaqqissusaaanerannit aammalu aqunneqarnerannit amerlanertigut  
aallaaveqarlutillu tunngaveqartarmata inunnut ataasiakkaanut pisuutitsineq tutsinnagu peqqisumik  
eqqarsariartaaseq toqqammavingalugu anguniangaqarutta pitsaanerpaamik angusaqarsinnaasugut,  
taamaattoq taama oqaraluartilluta soorunami inuup nammineq iliutsini akisussaaffiginerpaajugai  
naqissuserusupparput. Neriuutingaarpullu persuttarneqartartut minnerunngittumillu persuttaasartut  
ajornartorsiummut imaannaangittumut peqataatinneqarlutik alloriarnerit ingerlanneqarumaartut  
illersugassagullu pingaarnarpaat tassaapput meerartagut, taakku peqatingalugit tamatta  
toqqissisimanartumik inuuneqarsinnaanerput qularnaasimaniartariaqarparput tamattaalluta.